



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

f Tir Yimym

ig tiryimym@aolima

yt tir yimym

TAPAK 8



Maldives-i India dang sepaitem anizüker aotsü ashi

Shaun Marsh professional cricket asaya nungi anener

VOL. XXI NO. 92 (ADOK 92)

DIMAPUR

TENTONÜ (MONDAY)

ANJETI (JANUARY) 15, 2024

₹ 5.00

Modi Sarkar ki Guarantee
Aluyimba inyakyim tasen, aluyimertem azükarur

Kisan Credit Cards 7 crore 30 lakh lemogo;
Aluyimertem nem Rs .9 lakh crore jungnüa sen aputsüogo

Hamara Sankalp Viksit Bharat

AB-PMJAY beneficiary cards crore 30 agütsüogo

New Delhi, January 14, 2024 (Agencies): Centre sorkar indang health insurance scheme AB-PMJAY nung beneficiary cards crore 30 agütsüogo.

National Health Authority (NHA) ajanga Ayushman Bharat-Pradhan Mantri Jan Arogya Yojana (AB-PMJAY) mapa inyaker aser iba scheme ajanga kibong shia nem Rs 5 lakh health cover agütsür.

Ayushman cards teimtiba agütsübaji Uttar Pradesh nung crore 4.83 agütsüba lir, iba sülen Madhya Pradesh nung crore 3.78 aser Maharashtra nung crore 2.39 lir ta Union Health Ministry-i metetdaksüogo.

January 12, 2024 tashi nung state 11 nung Ayushman card holders crore 1 tema lir.

Iba scheme kübok tongtipang inyakyimji Ayushman card agütsüba lir aser beneficiary shiai iba ya angutsü atema mapa inyaker ta Health Ministry-isa ashi.

"Kanga dang meranga inyaka aruba ajanga scheme kübok 30

crore Ayushman cards agütsüogo. Tesüiba küm ana tsüngda 16.7 crore Ayushman cards yangluogo" ta parnokisa ashi.

"2023 küm nungi tenzüker tanü tashi nung Ayushman cards crore 7.5 yangluogo aser ibaji minute shia Ayushman cards 181 yangluba lir" ta Ministry-isa metetdaksü.

Yaküm November 15 nungi tenzüka Viksit Bharat Sankalp Yatra nung agütsüba on-spot services nung Ayushman card yangluba dena lir.

Iba Yatra ajanga Ayushman cards crore 2.43 yangluogo.

NHA-isa beneficiary card atema 'Ayushman App' yanglua lir. Yaküm September 13 nungi iba app ya lakh 52 den teimba download süogo.

Tang tashi nung tetsürtem crore 14.6 atema Ayushman cards yanglutsüogo.

Iba Scheme kübok nisung crore 6.2 shi ka mozü kidang anioka anepaluogo aser iba nung Rs 79,157 crore tema agütsüogo.

Manipur nungi Bharat Jodo Nyay Yatra tenzükogo Rahul Gandhi-i PM, BJP aser RSS aitsür



Imphal, January 14, 2024

(Agencies): Congress president Mallikarjun Kharge aser Congress lennir Rahul Gandhi nati Thoubal district kübok Khongjom nungi Bharat Jodo Nyay Yatra tenzüksüogo.

Iba sentong nung national aser regional Congress lennir aika aden aser Rahul Gandhi-i Yatra tenzüksüdag Manipur tensa atema BJP sorkar dak tai tongloksü.

"Ni 2004 nungi politics nung tetsüing ajemoka inyaker aser India nung sorkar ketdangsubaren ajunga loksar aliba mezüngbuba state semdang. June 29 sülen Manipur ya Manipur memesük kümadok, Manipur lemsa aser ajaklen tesempatep prokshi. Iba ajanga nisung lakh aika akoksa aser pei tenük agi ngua temeimertem taküm sama. Tang tashi nung India Prime Minister-i nenok nükztü aidoktsüsu atema state semdangi maru. Iba ya maaksü ka lir. PM Modi, BJP aser RSS atema Manipur ya India nung shilem ka masü asütsü" ta Rahul-i ashi.

"Manipur ya BJP-i tesempatep adokba politics tamaitü ka kümogo. Manipur ya BJP tebilemba aser tangatetba tamaitü lir" ta pai ashi.

Congress party-i Manipur nung tensa süngjema kümdaktsüsu ta Rahul-isa nangzüük.

"Ozüng alema inyaksangshiba, tesempatep aser rongsenketzüing tsütsü nisung kar dang takar akümba ya India mangdang masü" ta paisa ashi.

1891 Anglo-Manipur war nüngtem nung yangluba Khongjom War Memorial nungi Rahul-i narojung yuja tetushi agütsü aser iba sülen Yatra tenzüük.

Congress tongti lennirtem lia Congress president Mallikarjun Kharge-i Thoubal nungi bus gari apusoa yok.

Iba sentong nung CPI, CPI(M), JD(U), AAP, TMC RSP, AIFB, Shiv Sena (UBT), NCP dena INDIA bloc nungi lennirtem aden. Parliament nungi anenja aliba BSP MP Danish Ali aser Karnataka Deputy Chief Minister

DK Shivkumar naprong sentong nung aden.

Manipur nung BJP-i aniba sorkari iba yatra Imphal nung aliba ground ka nungi tenzüksü atema Congress nem temelaba magütsü.

Bharat Jodo Nyay Yatra ajanga state 14 aser Lok Sabha menden 100 ajanga sütsü aser March 20, 2024 nü Mumbai nung tembangtsü.

Rahul Gandhi-i taoba mapang tetsüing agi Kanyakumari aser Srinagar tashi kilometre 4,000 jajaba Yatra agia liasü. Iba sentong ya September 2022 nungi January 2023 tashi agi.

"Iba Yatra ya Congress party atema dang masü saka linük nung yimtenren tangatetba melenshütsü atema tongtipang lir. Bharat Jodo Yatra sülen ozü züingsemtem asentenshiogo aser tang onoki iba kasa yatra tenzükogo. Tanü nungi tenzüka Rahul Gandhi-i Manipur nungi yatra tenzüker aser Mumbai nung tembangtsü" ta Congress General Secretary (Communications) Jairam Ramesh-i ashi.

Delhi-NCR nung mopung kanga menenogo

New Delhi, January 14, 2024 (Agencies): Delhi-NCR nung mopung kanga menenba agi Centre sorkari Deobarnü tetuyuba kar agütsüogo.

Centre-i Delhi-NCR nung 'non-essential construction work' aser BS-III petrol o BS-IV diesel garitem mesenzütsü tenokdangba agütsü.

Commission for Air Quality Management ajanga tanep 10:00 aser 11:00 ako nung Delhi indang Air Quality Index (AQI) kanga teimba akümba bushiteta liasü.

Commission-i mapang talangka mopung menentsü ta ajitetba agi GRAP Stage-III curbs mapa tenzüksü lemet.

Iba tenokdangba kübok

national security/defence, projects of national importance, healthcare, railways, metro rail, airports, inter-state bus terminals, highways, roads, flyovers, overbridges, power transmission, pipelines, sanitation aser water supply dak sendakba maparen madener.

Graded Response Action Plan (GRAP) ya Centre sorkari asükwa mapang Delhi-NCR nung air pollution control plan inyakba lir.

GRAP nung telemsa pezü lir: Stage I - 'Poor' (AQI 201-300); Stage II - 'Very Poor' (AQI 301-400); Stage III - 'Severe' (AQI 401-450) aser Stage IV - 'Severe Plus' (AQI>450).

BJP-i single-largest party akümtsü akok

Kozhikode, January 14, 2024 (Agencies): Taruba Lok Sabha elections nung BJP-i single-largest party angutsü akok saka parnok den yaritepertemi parnoki pusema menungitsa menden ajemdaktsütsü akok ta Congress lennir Shashi Tharoor-i ashi.

BJP den yaritepertemi BJP

masü saka opposition teloktep ang yaritsüsa menden tajemba ngudaktsütsü akok aser iba atemaji onoki merangtsüla ta pai ashi.

India ya nisung temeyoktep aliba linük ka lir anungji state ajak nung opposition bloc INDIA pusemer 100% mali, ta Shashi Tharoor-isa ashi.

President Draupadi-i tanü Meghalaya Games tenzüksütsü

Tura, January 14, 2024 (Agencies): India Tir Draupadi Murmu-i tang mezüing atema Meghalaya kübok Tura semdangtsü aser iba mapang lai 5 buba Meghalaya Games tenzüksütsü.

Iba asayamong ya Tura nung aliba P A Sangma Stadium nung January 15 nungi tenzüksütsü.

Tir Draupadi-i asayamong

tenzüksüba ajanga taküm iba benjung kanga tamaitü keta amongtsü. Iba sentong nung Meghalaya Chief Minister Conrad Sangma aser Meghalaya Governor Phagu Chouhan na adentsü.

5 buba Meghalaya Games tenzüka sentong nung artist 300 shi kati Garo, Jaintia aser Khasi nunger tsüngangtem den sobaliba ken ajanga shilem agitsü

renema lir.

Meghalaya Games nung state kübok tesem ajunga nungi saisaponger 3,000 shi kati shilem aitsü. Iba asayamong nung saisapong telemsa 20 lir aser item nung Meghalayan sports densema lir.

Tan mezüing atema Tura nung amongba Meghalaya Games nung 'boxing matches' lir.

BJP Nagaland ajanga virtual media workshop agi



Dimapur, Aenjeti/January 14 (TYO): Bharatiya Janata Party Nagaland State Media Department ajanga BJP Head Office, Kohima nung January 13, 2024 nü "Role of Print & Electronic Media in the present context" omen nung ajemdaker 'One Day Virtual Media Workshop' ayongzüka liasü, aser iba sentong nung shisalen sayur National Spokesperson aser BJP Nagaland indang Prabhari, Nalin Kholi-i virtual ajanga jembia liasü.

Iba sentong nung State Social Media Convenor Rokovilie Chakhesang-i 'Co-ordination between Media &

Social Media' onük nung jembia, BJP Nagaland odongtar Kakuto Shohe-i 'TV Debate and Spokesperson's conduct' onük jembia, BJP Nagaland indang chief spokesperson Thomas Magh-i 'Leadership of Prime Minister Narendra Modi and his Government Achievements' onük jembia liasü.

Maneni Co. Chief Spokesperson, BJP Nagaland, Khevishe Sema-ia 'Lok Sabha Election Preparation' onük jembia liasü.

Iba workshop nung State Office Bearers, State Lok

Sabha Pravas Committee Members, State Social Media Team, State IT Team, State Media Team, State Mahila Morcha, State ST Morcha, State Minority Morcha, State Yuva Morcha, State Kisan Morcha aser District 14 nungi Media Department Team züngsemtem dena liasü.

Iba workshop mezüngbuba session nung menden ya Sapralu Nyekha, Media Officer & Convenor of State Media Department liasü aser tanabuba session nung menden ya Mughavi Chishi, Spokesperson & State Media Incharge of BJP Nagaland liasü.

Rahul Gandhi ano Manipur raksatsüi aru: CM Biren Singh

Imphal, Aenjeti/January 14 (Agencies): Congress lenir Rahul Gandhi-i Manipur semdangba mechi tebilemsü akaba Manipur Chief Minister N Biren Singh-i January 14 nü lemsatop aser taoba mapang pai semdang dang mepetmesü adokba ama ano adoktsü tsüboab bilemba shia liasü.

"Yatra ya Bharat Jodo masü; ni atema ibai Bharat Todo lir. Taoba mapang Rahul Gandhi-i semdang dang, pai Manipur sadangtsü aser tang Manipur tanemi sunema akumdang ano pai sadangtsütsü aru," ta CM N Biren Singh-i ashi.

Nüburtem kanga kumdanga

alitsüla aser taoba mapang Rahul Ganhi-i state semdangba bilemtetsüla ta pai ashi.

8th Armed Forces Veterans Day-2024 amungtsü lia jembidang, Manipur ama state nung rally ayongzüka politics sayatsü mapang masü, ta Singh-i ashi.

Telemsa adoktsü mera agitsü masü saka asendenshitsu mapang lir, ta ashi.

Bharat Jodo Nyay Yatra tenzüksü mechi Rahul Gandhi ya Deobarnü Imphal nung aliba Bir Tikendrajit International Airport tonga aru. Mapa manguba, osettsüset nung jenjang atuba aser social justice

ama ken o balala bentettsü nükjidong nung iba yatra ya ayongzüker aser ibai election dak sendakba masü saka 'ideological journey' amai lir ta Congress-i ashir.

Iba yatra nükjidong ya Narendra Modi-i aniba sorkar kübok "anyay kaal" (era of injustice) tatem kati arudaktsütsü asoshi lir ta Congress-i ashir. Iba yatra nungya bus aser tetsüng agi kilometre 6,713 jajatsü aser state 15 nung Lok Sabha constituency 100 ajanga aotsü. Anogo 67 yatra nungya district 110 nung kongshitsu aser Mumbai nung March 20 mesüra 21 nung tembangtsü imlar.

Nagaland Indigenous People's Forum ketdangpur tasen shimogo



Dimapur, Aenjeti/January 14 (TYO): Nagaland Indigenous People's Forum (NIPF) lokti senden January 13, 2024 nü Tourist Lodge, Dimapur nung mena liasü.

Iba senden nung NIPF tir Dr. Temsuwati ajanga iba Forum inyaksangshi osang agütsü aser 2017 küm iba Forum tenteter inyakyonga aruba indang shia liasü.

Dr Lima ajanga sarasadema iba senden tenzük aser senden nung lisopur (Indigenous) kumzüka ayutsü atema onük balala jembia liasü.

NIPF tejakleni anir aotsü atema teloki mulunga ketdangpur yamai shima liasü: President, Dr. T. Lima Jamir; Vice- Presidents, H. Sunep Phom, Kakheto K Sumi, Keneilietuo Zumvu.

General Secretary Richard

Haolai; Finance Secretary Arila Sangtam, Publicity Secretary Honikali Lohe, Cultural Secretary Alise Sangtam, Asst. Gen Secretary Kikheto.

Maneni Executive members Dr. Senti Jamir, T. Nyiekha, Philip Rengma (Adv) aser Advisor nung Kheheto K.Swu (Member NEIPF) aser Dr. Temsuwati (Ex-President-NIPF) shima liasü.

Nagaland Angh-i Sokronye benjong salem lemsatop

Dimapur, Aenjeti/January 14 (TYO): Chakhesang kin dangi Sokronye benjong salem abener, ta Nagaland Angh La Ganesan-i sangdong ka nung ashi.

Sokrony ya aluruba benjong ka lir aser iba tebour tajung benjong nung nüburtem meshiteter aser temoatsü

jazüker aser lungjemshir. Chakhesang kin tem iba Sokronye benjong amungdang tepela aser tesunep lidakjang ta moatsür.

Iba tepela benjongmung nung nisung ajak anema aliba, tesunep aser yimchiyimjung lidakjang ta sarasademer, ta Nagaland Angh ajangasa ashi.

Manipur tensa asoshi Congress tiri PM Modi aitsü

Imphal, Aenjeti/January 14 (Agencies): Tanü Congress tir Mallikarjun Kharge-i Manipur tensa asoshi Ato Kilonser Narendra Modi aija jembia.

Thoubal nung Bharat Jodo Nyay Yatra tenzüksü sentong nung jembidang, PM Modi ya vote meshitsü atema aru saka Kharge-i ashi.

"PM Modi ya Manipur-i vote meshitsü aru, saka Manipur nung nüburtem timtem nung aliba mapangbo tejak-a mesayu," ta pai ashi.

Deobarnü Bharat Jodo Nyay Yatra ya Thoubal district kübok Khongjong nung Rahul Gandhi aser Kharge nati tenzükogo.

January 14 nikongdang 5:30 ako nung parnok Imphal nung aliba Koirenge Bazar nung anisingzük aser Imphal kübok Sekmai nung aliba Koujengleima Sports Association Football Ground nung mejangtsü.

Rahul Gandhi-i anir anogo 67 jajatsü aliba yatra nungya parnoki aluyimer, aayanger, dalits, tribal nisungtem ajurutsü.

Taralango nung Karbi Youth Festival tenzükogo



Guwahati, Aenjeti/January 14 (Agencies): Karbi Cultural Society (KCS) ajanga ayongzüksü Karbi Youth Festival (KYF) küm 50 ajungba benjongmung Diphu nungi kilometre tenet pilar Taralango nung aliba Karbi People's Hall (KPH) nung Honibarnü tenzükogo. Diphu ya Assam kübok Karbi Anglong district headquarters lir.

Karbi Anglong Autonomous Council (KAAC) indang Chief Executive Member (CEM), Tuliram Ronghang-i iba benjongmung tenzükja liasü.

Iba sentong nung jembidang, "Mezüngbuba KYF ayongzüksü nung Roy Inghi aser Lunse Timung nati tongti shilem agiba aser Karbi nung sobaliba aser yimsüyimpong asendenshiba ni bilemteter. Taralango kanga melenshiogo. Ibai tangbo Karbi nung asoshi cultural centre ka kumogo. Asenoki lungjemer inyakra, Indian constitution indang Article 244 (A) nung ajemdaker asenoki akhangba Autonomous State angutsü," ta pai ashi.

Karbi kini sobaliba yimya balala sayuba reprangtsü atema Tir Droupadi Murmu-i January 17 nü iba benjong semdangtsü.

Iba benjongmung tenzükba sentong nung Deputy Ambassador of Myanmar, Tin Tin Htwewin aser la kinungbo Soe Moe Naing; Deputy Ambassador of Lao PDR, Keo Sengdavong aser pa kinungtsü Khampheng Luanglath; First

Secretary, High Commission of Malawi, Joseph Austen Kawinga; First Secretary, High Commission of Ghana, Konrad Nana Kojo Asiedu aser Executive Secretary to the High Commissioner of Ghana, Jae Bhatnagar nungertem dena liasü.

KYF hon jubilee tenzükba mezüngbuba KYF amungdak Karbi Club nungi yimtung süa jaja liasü.

Iba sentong nung Karbi Anglong aser danga district tem nungi KCS Zone 35 nungi lanur 3,000 dak temai shilem agi.

Taralango nung KCS tir Kro-i KCS nisan sala aser KCS central choir ajanga KCS anthem tena liasü.

USA nung amenoka aliba NGO 'Cultures of Resistance' den lungjemer Culture of Resistance Award ya KCS ajanga KCS founding president, Lunse Timung aser founding general secretary Roy Inghi aser nungtugu Karbi tsür kentener Pokhila Lekthepe nung nem agüja liasü.

Inghi aser Timung na nem memento den sen 20,000 indang cheque agütsü aser Lekthepe nem memento den sen 25,000 indang cheque agüja liasü.

KYF ya Northeast nung ethnic festival tejentiba aser tambusang ta züngshir aser iba benjong ya January 19 nü tembangtsü.

Mezüngbuba KYF ya 1974 küm Karbi Club, Rongnihang, Diphu nung munga liasü.



New Delhi, January 14, 2024: Congress lenirtem- Rahul Gandhi, Salman Khurshid, Digvijaya Singh, Abhishek Singhvi, Rajeev Shukla, Randeep Singh Surjewala aser Ashok Gehlot nunger 'Bharat Jodo Nyay Yatra' tenzüksü atema New Delhi nungi tayimtsü ajanga Manipur-i aotsü lia tangokba noksa nung angur.

Maldives Tir, Muizzu-i India dang sepaitem aienshitsu tuyu

New Delhi, January 14 (Agencies): India aser Maldives na tsungda tesendaktep tamajungba akumba mapang Amongnü Maldives-i India dang March 15 anogo tashi nung asetkong nungi India nunger sepaitem aienshiang, ta tuyuogo.

Maldives Tir, Mohamed Muizzu-i India dang archipelago nungi India nunger sepaitem aienshiang ta tuyuogo, ta Tir office nung public policy secretary, Abdulla Nazim Ibrahim-i osangbenertem nem metetdaksü.

Tang Maldives nung India nunger sepaitem 88 lir.

Amongnü Ibrahim-i, "India nunger sepaitem Maldives nung alitsü makok. Iba ya Tir Dr. Mohamed Muizzu aser administration inyakyim lir," ta metetdaksü.

Sepaitem aienshitsu atema jembishinitsü asoshi Maldives aser India nati high-level core

group ka tenteta lir aser Amongnü Male nung aliba Foreign Ministry Headquarters nung tang mezung high level core group senden menogo.

Iba senden nungji Indian high commissioner Munu Mahawara aden.

Nazim Ibrahim-i, March 15 tashi nungbo India nunger sepaitem aienshiang ta mepishitsu asoshi iba sendenji ayongzüka amen, ta metetdaksü.

Tawa Ato kilonser Narendra Modi-i Lakshadweep semdangba indang noksa kar lemsatepba sülen Maldives nung minister asema India Ato kilonser, Narendra Modi anema jembiba ajanga linük ana tesendaktep mejungi kümogo.

Iba sülen Maldives sorkari minister asemji anenja liasü. Iba mangatettep ajangasa India nung Boycott Maldives campaign tenzüka liasü.

Maldives Tir Muizzu-i, Tir election atema nüboyimba mapang nung pai India nunger sepaitem asetkong nungjagi aienshidaktsütsü, ta metetdakja liasü.

Pa Tir tenangzüka agizükba sülen-a pai India dang sepaitem aienshitsu mepishia liasü. Tawa Muizzu-i China semdangba mapang nung pai China dang Maldives nung tourism ajungkettsütsü ayongzüka liasü.

China nungi meyipa aruba sülen Honibarnü osangbenertem den jembidang pai jakdaka mesüaka India aitsüba olen kar jembigo.

India tenung metetshii Muizzu-i, "Onok linük tilaka dang süaka ibaji ajanga onok madak inyaktsü atema nenok nem license magütsür," ta jemi.

Maldives-i taoba mapang sorkari India den tezüngzüktep agiba 100 shi meyipa reprangshidar.

Delhi nung tzüsü ajanga tayimtsü aser train aika mesenzüteter

New Delhi, January 14 (Agencies): Amongnü Delhi nung mepet tzüsü temelem aliba ajanga tayimtsü aser train aika mesenzüteter. India Meteorological Department (IMD)-i January 16 tashi Delhi densema north India tesem aika kanga temekong asütsü aser tzüsü alitsü, ta metetdaksü.

IMD-i, "January 13 aonung 11:30 ako nung tzüsü liasü: Punjab, Haryana, Uttar Pradesh aser northwest Madhya Pradesh tesem aika nung tzüsü liasü aser Chandigarh, Delhi aser Assam nung tesem aika nung tzüsü alilen liasü," ta metetdaksü

Mepet tzüsü tali aliba ajanga Delhi nung aliba Indira Gandhi International (IGI) Airport nungi tayimtsü senzüba kongshitsu akok, ta Honibarnü IMD-i metetdakja liasü.

Delhi nung IGI airport-i sangdong ka ajanga, "Delhi

Airport nungi tayimtsü apusor mesüra anenzükter, saka CAT III masüba tayimtsütembo kongshitsu akok. Passenger tem dang mapang shia tayimtsü senzüba osangtsüsang airline den metetpelatsü mepishir," ta metetdakja liasü.

CAT III ya navigation system ka lir, koba ajanga mepet tzüsü tali melema aliba mapang nunga tayimtsü anenzüksüsa yarir.

Northern Railways-i ashiba agi, mepet tzüsü tali melema ajanga Delhi nungi linük tesem balalai apusoa aoba train aika menor ang apusoa liasü. Tan asükwa mongpu nung Delhi nung minimum temperature ishitibaji Honibarnü 3.6 degrees Celsius liasü.

IMD-i, January 16 tashi Delhi densema northwest India nung mepet tzüsü temelem alitsü aser kanga temekong asütsü, ta metetdaksüogo.



January 14, 2024 nü Bhopal nung BJP MP, Pragya Singh Thakur-i Bhopal Kite Festival nung shilem agidang tangokba noksa nung angur.

Milind Deora-i Congress party toktsür Shiv Sena nung denogo

New Delhi, January 14 (Agencies): Congress lenir aser taoba mapang Union Minister, Milind Deora-i Amongnü Congress party toktsür Shiv Sena nung denogo.

Maharashtra Chief Minister, Eknath Shinde densema aliba senden ka nung Deora-i, "Ni asoshi iba anogo ya temelung shirangtsü anogo ka lir. Ni Congress toktsütsü, ta ni kodanga mebilemi liasü. Tanü ni Shiv Sena nung denogo," ta metetdaksü.

Congress toktsüba kuli metetdaksüdang Deora-i, "Iba party yagi linük atema tajung tebilema aika agüja liasü saka tangbo parnok nukjidong ka dang lir aser ibaji- Ato kilonser Modi-i jembiba aser inyakba ajak aitsür," ta metetdaksü.

Milind Deora-i, "Tanep nungi tenzüka kü dangi phone call aika arur aser kü dang, 'ner kibongi küm 55 tashi Congress party den tesendaktep ayuba kechiba nai raksa?' ta asüngdang. Tayongzüka tulu aliba mapang nung ni party den akanga nokdaka liasü. 1968 küm kübui (Murlu Deora) Congress nung adenba mapang nung aliba party aser tanü Congress na ya khenyongi balala," ta ashi.

Deora ya taoba mapang South Mumbai nungi Lok Sabha MP liasü.

Ato kilonser Modi tenüngsanga Deora-i, "Centre aser state tem nung sorkar tashitait nungdaker. Ato kilonser Modi lenisüba kübok tanübo India tashi taitba akümba ya asenok ajak atema nümatangtsü lir. Ni ya shisemner, tesüba küm 10 tsungda Mumbai nung kiralongra tatalokba ka danga maliasü. Iba ya Mumbai nung alirtem atema takok tuluka lir," ta ashi.

Deora-i social media ajanga-a, "Yimtenren nung tanü ya ni asoshi kaket tapak ka shibangba anogo lir. Ni Congress primary zungsem nungi sodi meshiogo aser ibaji ajanga ozü kibongi küm 55 tashi party den tesendaktep aliba raksar," ta metetdaksü.

2014 aser 2019 Lok Sabha elections nung Deora-i South Mumbai Lok Sabha menden nung Shiv Sena lenir, Arvind Sawant matsüngdang tamakok ngua liasü.

Congress-i taruba Lok Sabha election nung Mumbai South mendenji pa nem agütsütsü ta menanzükttetba agi pa mepelaba liasü ta osang angazükter.

ED amakba ken o nung North 24 Parganas nung ano nisung 2 puogo

Kolkata, January 14 (Agencies): Tawa West Bengal nung Enforcement Directorate (ED) ketdangsertem amakba ken o dak sendakba nung Amongnü anepdang züngia North 24 Parganas nung ano nisung ana puogo.

January 5 nü Sandeshkhali nung lokti kati ED ketdangsertem amakdang gari raksatsü aser ketdangsertem aika yirua liasü.

Police-i, iba ken o nung tai tonglokja alir nisung ana- Sanjay Mondal aser Ali Hossain Gharami na North 24 Parganas kübok Najat nung aliba ango tzübo farm ka nung atsüka lia puogo, ta ashi.

Tenaprong local court matsüngdangi anir aoba sülen judicial ket nung agütsüogo.

ED ketdangsertem amakba dak sendakba nung state police-i FIR asem benoka lir.

Ration ochimashi ken o dak

sendakba nung ED team kati ruling TMC nungi North 24 Parganas district nung block-level nung lenirtem ki mita aoba mapang nung Sandeshkhali yimadak TMC lenirtem pusemertemi ED ketdangsertem gari amak.

January 5 nü ED-i taoba mapang Bongaon Municipality nung Chairman Shankar Adhya aser TMC lenir Sheikh Shahjahan'er ki mita aoba mapang ED team ji amak.



January 14, 2024 nü New Delhi nung Ato kilonser Narendra Modi-i Pongal benjung nung shilem agidang tangokba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, JANUARY (AENJETI) 15, 2024

BJP maginüba telok

India nung Congress teloki anir BJP kenyongi maginüba telok 26 tashi Bengaluru nung yaküm 2023 küm July 18 nü telongjem senden ka lia taküm küm agitsüba Lok Sabha election nung BJP anema külemi nokdaksü asoshi telongjem tentet ka tenüng agi Indian National Development Inclusive Alliance tentet. Iba telongjem telok ya kodang tatsüba nung amshidir INDIA ta adoker. Atangji, iba telok tentet tenüng ya kanga bilemdanger jatetba telok ka asütsü ta bilemer, kechiyong INDIA teloki India nung ajak ajungtsü atema inyaksü ta ayimoktsübaji India nung asoshi tepuatsüka lir. Ibayongji, BJP telokia meyiper linük tenüng India ta amshia aliba ya India melena Bharat ta amshitsü tenzüka angur, kechiyong BJP asoshi India aser INDIA na bendangtsüba ya kanga tongtibang mapa ka kümogo. Aji oda, linük temzüng agibo India aser Bharat naji tenüng kasa ta shia alinungji, India melen Bharat amshibaji kecha tebilemba aser nukjidong tasen ka masütsü. Ajisüaka, takok angutsü asoshibo telok tenüngbaji masü saka telok jagi kechi komaka inyaker ta asüba dak keta lir. Atangji, tanü India nung BJP teloki aniba telongjem National Democratic Alliance (NDA) telok akoktsüba ya mapa temelaka masü. Tang Lok sabha nung tatar menden 543 nungi NDA telok nungi tatar 300 dak tali lir, anungji tatar senden nung jembitsü ken o benokba ajak nung parnok mezüshia akoker. Ibayongji, tangbo BJP teloki mulungba nung yimten telemtetba aser temzüng ozüng ajak kecha tetsükdak melii melamelaa telemtetba agitetter. Iba tashi aser teimla nung tangbo ano NDA telongjemi Lok Sabha nung tatar menden 400 agitsü nukjidong nung inyaksü sentong lir. Iba tashiji tizükteta yimten nung raratsübaji INDIA telok asoshi tongpang kanga tulu aser tasak ayongzüka ka asütsü, anungji parnok teloktem rongnung takok angutsü mechi 'niang magili, na-ang agiang' ta asüba tangatetba tenla aika nungdaksü. Ano, INDIA telok asoshi iba tenlaji dang masü saka kechi atema BJP maginer (?) ta asüba onük aser kulitemji nübertem nem jungjunga angatetdaksütsübajia kanga tongtibang teinyaksü mapa ka asütsü. INDIA teloki BJP maginüba kuli kisüng agibo India nung mulung makoktsü, kechiyong India nungertemi BJP dangbo Congress mulungjang aser Congress mapatem temetetba aser INDIA telok nung aginüyonga-maginüyonga Congress teloki anitsüsa akümer. Aji oda, BJP maginüba kuli kija jagibo Congress teloki anir INDIA nung alirtemi yimten tashi amshia yimsü sünüba dak alaka India asoshi NDA dang nungi tajungba inyaksü tejangraba aser tangatetba nübertemi mangutsü. Itemji inyaka aotsü atema tang INDIA teloki parnok telongjem anitsü atema Congress tir, tambu Mallikarjun Kharge mendenbuba asütsü shimbaji kanga junga apidanger shimogo ta bilemer. Atangji, INDIA telongjem nung adener tanga yimten teloktem nungia parnok anitsü asoshi yimten lenir takoktet tajung shiba shimer, shiba meshim ta asütsüsa aika lir, saka BJP den tokteptsüsa Congress nungibo Congress nungi, saka Nehru'er kinungertem masü tanga ka shimba jagi NDA ola tajemba aser INDIA ola tesademba ta akümtsü koka lir. NDA nung alirtemi Congress telok aitsübaji, talisa, Congress telok ya Nehru aser Gandhi'er kinunger senmang amai kumdaksüba ajanga lir. Iba kuli jagi taoba mapang Congress teloki aniba UPA government nunga Sonia Gandhi ato kilonser akümtsü melena Manmohan Singh-ang akümba asenoki meteta lir. Iba tangatetba nung INDIA telok nungi mendenbubaji dang masü saka ato kilonser asütsüba nisungjia Nehru-Gandhi'er kibong nungi masü saka tangar ka, taoba mapang Narasimha Rao aser Manmohan Singh nung shimba ama, nübertem dang sayutet nungbo, iba jagi INDIA telok keti India arutsü kanga tasakbo masütsü.

OLEMSABANG

NAGA NUNGER LEMTET LENDEN

~ P. Renthly Jamir

(Yashi adok nungi...)

Küm pungo lili election atongdang khen NSCN, NNC telok telok ano BJP, NNDP, NPF, Congress aser Naga Hoho ta NMA ta NSF yamala telok ajak ara atua Solution tama asütsüla, Naga Political Settlement to koda ta asatenba yagi Naga nung alizüngji tongtetdima ta bilemer. Angoi ango achir, peri per meir, ozüi ozü achir. Yamaji Naga nungeri Naga nung tapayu mali tepsetba atakatem parnok züjagi ali nungi ayimtenba teyangluri mangashi-i malitsü. Mezüngbuba ano India nung den junga meraradang tamasaba 1955 NNC General Secretary T. Sakhrie tepseta entoker tenzüka tai makar nübu zünger mezüngma tepsetba den tongti tenzüker Brigadier Ngamlao Konyak, Gen. Kaito, K. Mayanger telok. Gen. Secretary NSCN (K) Tally Mongro tema nung tenzüker Dr. Imkongliba ama, MLA Nuklu Konyak aser Pauting Phom, Charlie Kevichusa, Tobu Kevichusa, Commandant Akangyanger, Holohoner kibong, MLA Ayubar kidang tai makar zü tokshitsüba, aji dang masü Naga nung masüba kin Zunheboto DC K.K. Gupta, Kohima DC Dr. L.V. Reddy, IAS Mokochung S.P. Ved Prakash item kinungtsür aser chirnurtem nüktzü ano tayi mokongi lir. Kechiaser Kibubai parnok nüktzü pa bongdang nung rizünger. Item tasür rongnung tongtibangsa Mokochung S.P Ved Prakash kinungtsü kanga kukua mapang talangka mang ayimba otsü yimdangi arur. Kibong kanga lanu bendanglima kecha tai makar tepsetbaji tapayutsüka liasü. Nüchiso bushir tenüng atemer tsükchir den raratsü melena pei nübur dang arishia tepsettepa ya atakatem ulura ta bilemer.

Naga nung sensaker tilaba nungi takar tuluba tashi kata maioktsüi züklem Kilen sarutepli India nung den raratsü ta sür Pakistan, China limai hatir abeni oli ta senzüdang parnok nem training agütsür foreign authority instructor kati tepila o ashidang L/Corpl W.Woshan Heimi dang yamai ashi, ta asüba o-ji bilemteter. I feel pity on you because you are not going to use these arms and ammunition against your enemy but to kill your own Naga brothers. Ni kanga aochia bilemer, kechiaser item raraba osettem ya nenok tsükchir den raratsüba masü ner adianu tepsettsü bener aor. Aser iba tepila Shin o metsütsüi shitak ataloka aru. Yangi tatishitsü ka bena arudi, June 4th nü 2015 Manipur nung NSCN (K) teloki Indian sepoy 18 kaset aser aika yirutsü.

Iba tatalokba nung osang kaket (Nagaland Post 12-06-2015) nung yamai adok. Government turned down NSCN (IM) offer to take on rival. New Delhi JUN 11 (PTI) NSCN (IM) which is in peace talk with centre expressed its desire to help security forces hunt down its arch rival NSCN (K) rebels who killed 18 soldiers in Manipur but the offer was turned down PTI reports stated. India nung denbo yimjung atema jembir saka pei adianu (own brothers) denbo tsükchir den senteper raratsü mulungsentsü adembaji atakatem mapa ta bilemer. Naga nüchiso wadang nung inyakeritemi item shinba ataloktsür "Nisung shingai ni kechi inyak ta pei majungba nungi temulung memeyiper" Yer: 08:06. Pei adianu den raratsü Manipur, Nagaland aser Myanmar border ajanga oa raratsü Indian sepoy den join sünür ta kasa osang kaket nung zülua lir.

Süra Framework Agreement nung takok ngudima ta bilemer. Küm 5 election arushia asatener shilem agir NSCN (IM) telok, NNPGs telok dak alaker shilem agia Delhileni onür MLA telok, Naga Hoho, NMA, senior citizen, Gaon Bora Federation ano Niki teloka atentsüla ano Laishir aser tetsür telok tendaktsünür. Saka ya metetdi, Tsüngremi atakatemala mapa nung kodanga tejang matangtsü. Indira Gandhi mapang Defence currency, External Affairs aser Communication dak alema ajak nenok sasa süang ta ashi aser Prime Minister level nung jembir. Azüi mapok chi meshi chiyung aji maa ta ashi. Tanübo Intelligence Bureau ka den Chumukedima nung jembir. Küm 1966-67 nung Prime Minister level nung New Delhi oa jembir. 1975 nung Governor den Shillong arua jembir. Tang Intelligent officer ka den Chumukedima nung jembir. Joko tanaben meyiper asentenshia New York atongtsübo küm 430 nungjia metongtettsü südi ta asadangteter. Koba yimti nung Noklangnok agi, meritsüng atsüngtsü joko raratsü mangazüktsü (Isa: 2:4) ta zülua yur kin 193 walu atener. Item kin rongnungji züngsemtsü nübertemi yongyar. Saka tanaben temerem tzüyim bushia lua len talangba kumdakja Lemtet lenden nung nemzür. Ano tesüngmangtsü kaji Nagaland state nung election tokteper partybo toku ter saka adokerbo Naga Solution atemer opposition nung amener MLA kata mali democracy lima nung opposition maliba kecha lima maka. India nung state tulutiba U.P., Bihar nungi shir tilatiba state aser union territory kecha nung opposition maliba mali. Kechiyong Naga nung MLAtemi nübertem dang maaker. Communist lima nunga opposition telok lir nung India lima alima nung Democracy lima tulutiba nung ruling MLA tesa joko Assembly senden talangba agi anogo ana nü dang amener, tejembir mali. Chief Minister shibai Finance amer pai taruba teindokba metetdaksür senshir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Manipur nung Evangelical lenir, Rev. H. Chungthang Thiek süogo



Rev. H. Chungthang Thiek

January 14, 2024: Sayutsüingir aser taoba mapang Evangelical Fellowship of India (EFI) northeast region nung secretary, Rev. H. Chungthang Thiek alima nungi pilaogo; pa arrshi küm 75 liasü.

Pa EFI nung 1988 küm nungi 2016 küm tashi (küm 27) inyakba mapang nung pai iba organization aser Arogo atema mapa tajung aika inyakogo, ta EFI-i metetdaksü.

Pai Churachandpur anasa "Prayer Mountain" movement tenzuka liasü.

Taoba mapang Union Biblical Seminary nung azünger, Rev. Thiek-i Manipur nung dang masü saka Arunachal Pradesh, Assam, Meghalaya, Mizoram, Nagaland, Tripura aser Sikkim state tem nung tenzuka aru. Northeast India region ya China, Myanmar, Bangladesh, Nepal aser Bhutan linüktem den arrtsülen lir.

Tang Manipur nung Kuki-Zo Khristantem anema inyakba mapang ka nung Rev. Thiek süogo.

Northeast region nung tesendaktep yanglutsüba nung Rev. Thiek-i tongtibang shilem agi aser rara balala, talisa Hmar aser Dimasa kin na tsüingda rara anentsü atema pai

tongtibang shilem agia liasü. 2000s mapang nung Manipur aser Assam na nung arrtsü dak sendakba rara aser kin tsüingda rara aliba mapang nung pai yimjung atema tongti shilem agia liasü.

Pai asaya-menü densema kanga junga sayutsüingir aser pa dak organization lenitsü atema sempet tajung liasü, ta EFI-i metetdaksü.

Pa lenisüba kübok northeast nung EFI kanga renlokogo aser pa lenisüba nung training programs aika ayongzüka agia liasü.

EFI General Secretary, Rev. Vijayesh Lal-i, "Rev. Thiek ya northeast tesem ajaklen Arogo lenir ka liasü. Pa süadokba ajanga tapok tulu apatsü. Pai ochishia alizüing tonga asemogo. Pa den külemi inyaksema aser region tesem balala semdangbaji ni asoshi maangka tajung liasü," ta metetdaksü. Rev. Lal-i, Thiek-i pa atema northeast region lapoktsü aser lenla ajak nung len sayur ka liasü, ta ashi.

"Pai region nung 'Standing Strong through the Storm' seminars tenzükba ajanga lenirtem aika tajangzük nguogo. Pa dak sasapela aliba, tashi tulu aliba aser tenzüksü jangraba ni bilemteter. Künati külemi

sem dangba tesemtem rongnung talisa Arunachal aser Tripura semdanga ni kodanga mamateter. Onoki pa temang anema alitsü atema sarasademtsüba den külemi mapang tatsüka pa aser par kibong EFI centre nung agizüka liasü. Küm tasen nunga pa ajurutsü ni yongyaa liasü, saka joko asen Teyanglur matsüing dang ang külemi ajuruteptsü," ta Lal-i metetdaksü.

Lal-i, "Thiek ya Tsüingrem atema kilir tajung ka liasü," ta shisem.

Taoba mapang EFI nung general secretary, Rev. Richard Howell-i Facebook post ka ajanga, Rev. Thiek ya Tsüingrem lar tajung ka liasü aser sayutsüingir tajung ka liasü, ta lemsatöp.

Howell-isa Rev. Thiek-i alima tesem balala nung sayutsüingiba aser Manipur nung "prayer mountain" tenzükba lemsatöp.

Rev. Thiek asüba ya par kibong atema dang masü saka pa indang ministry ajanga kongshiba taküm aika atema takoksa lir, ta Howell-isa shisem.

Rev. Thiek-i pa kinüngtsü den jabaso asem toktsür alima nungi pilaogo.

ANOGO ABEN TSÜNGREM DEN

Khristan liba-liro tetenzükdak Mathi 4: 18-25.

Meimchir temetetba nung Nazaret nunger Yisui yaribaji meimchiri rasaa ashitsüba atema yari. Asenoki Yisu indang bilembaji Talangzüker aser Kümtetdakba ta angatetba nung dang atemer. Pa aji liasü, saka ano iba dang tali.

Tanga balaka rongnung, Yisuji mapang ajak nung liba-liro tesayur tulu ka liasü. Yisui tebilemba ka mesüra tangatetba ka nung dang Pa asoshi aser tanger asoshia tekong meranga mesot, Pai ajak asoshi jakla (morality) nung sot. Yisui ajaba odang lir: "Ni anidakang". Iba tajaba nung tashi angatsü asoshi shidak bilemetsü aser shidak alitsü temeshi tebilemtetba nungdaker. Iba nung Khristan kati Khristan jakla tashi angur.

Telok nung jenjang akatsü asoshi Yisu sayuba liba-liro yimya ozüingji kija takümi amshitsüla. Alima nung rongsen meshidaki lemsatöpba nung ni kechi inyaksü? Ajemrepa alirtem tsütsü Kü tebilemba kechi? Yisui "Kü sülen anidakang" ta ashiba tetezü kechi?

Item nung shisadandang: mapang agia Mathi 5:1-22 züingang. Iba liba-liro ozüing ner telok nung, ne mapa nung, ner arogo nung aser ner kidang koda amshitsü bilemdandang. Nai iba tesayuba nung alitsü meranger asü?

Sarasadem: O Kibuba, ne lemanng Kü dang sayuang, aser ni lenten lemanng nung aniang. T.Ken 27:11

Tenangzükba: Koba lemanng nung na aotsüla iba lemanngji atema ni ne dang ashitsü aser sayutsü: Ni Kü tenük ne dak yur sayutsüingitsü. T.Ken 32:8.

India nunger Khristantemi UK nung Arogotem tashi itdaksür

January 14, 2024: Tang United Kingdom nung aliba Arogotem nung züingsem kanga ajema akümba mapang nung India nunger Khristantemi item Arogo asentenshitsütsü atema inyaker, ta report ka ajanga metetdaksü.

'Indian Christians find comfort and joy in Church communities across Britain' ta ajaba report ajanga Arogotem nung züingsemtem asüingsashidaksüba otsü shia lir.

Liverpool nungi London tashi aser Preston nungi Bristol tashi UK kübok yimti aika nung Arogotem nung züingsem asüingsashidaksüogo.

Liverpool nung aliba St. Thomas's Indian Orthodox Arogo nung putir, Happy Jacob-i aniba Arogo nung tesüiba küm 20 tashi kibong 60 shi dang liasü saka tangbo iba Arogo nung züingsem kibong 110 kümogo, ta iba report nungji shia lir.

UK nung alir India nunger Khristantem, talisa Kerala aser Tamil Nadu nungi aruba India nunger Khristantemi UK nung aliba Arogotem tanaben asüingsashia shia arudaksüdar.

England aser Wales nung Khristan züingsemtem tajemba akümba mapang nung India nunger Khristantembo teimba

dang kümdar. 2011 küm UK nung nütsüing shilem 59.3 Khristantem liasü saka 2021 küm nungbo nütsüing shilem 46.2 dang Khristantem liasü.

British & Foreign Bible Society nungi Rev. Joshua Raja-i, "Khristantem aika India nungi arudar. India nungi aruba Khristantem teimbaka Catholic Arogotem nung adener saka Anglican Arogotema karbo indar. India nungi UK-i arur karbo Protestant denominations nungi lir," ta metetdaksü.

Church of South India i(East Ham, East London) nung secretary, Pradeep George-i, coronavirus wara metenzük dang nungi kibong aikati Tenla kidangi arur aser parnok teimbaka South India kübok Kerala nungi lir, ta metetdaksü.

Tawa Qatar linük nungi arurtem aikati Arogo nungi teyari angur, aser item kibongtem rongnung Suriya Varghese aser Anup Cherian nunger kibongtem densema lir.

Anup Cherian-i, "Onok taküm nung Arogoi kanga tongtibang shilem agir. Iba ya Arogo nung züingsemba ajanga lir," ta ashi.

(Maneni tapak 7 nung...)



Pakistan nung Khristan amitsür, Musarrat Bibi (ajichilen)-i Tsüingrem atalaogo, ta la nem tai tonglokja liasü saka la anema kuli peria manguba ajanga la chiok. Ajisüaka la mapa nungi jendokba dang masü la taküm lendong nung aliba ajanga la jenshia dang senzüdar. Yaküm April 15 nü Pakpattan District nung aliba Government Girls Higher Secondary School nung storeroom merüktetdang lai Quran tapaktem shisatsü, ta la nem tai tonglokja liasü.

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Shirang

(n) temang mejungi aküm, tashidak agi menep (sick, illness)

* Yaküm küm dengue tashidak agi nisung agi shirang.

Shilushira

(n) temang timtema aliba (sickly)

* Merükmeju melira kidang shilushira agi tongpet atongtsü.

OLONG PAITEP # 6667

1						2				3
								4		
5		6				7				
8										9
									10	
					11		12			
		13								
14										
					16					

TIPIEN

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüik asendak - 5
- 14. Tsüngpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 6666 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer,
- 13. Sen, 15. Kioktsü, 17. Itsük,
- 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüktsü, 6. Azübenshi, 8. Lah,
- 9. Jangkok, 12. Akok, 14. Nashi,
- 16. Sür.

NAI-A YA METETTER MA



January 22, 2024 nü Ayodhya nung Ram Temple meshiteta lapokba anogo India kübok state kar nung 'dry day' sangdongogo. Iba anogo atema state sorkartemi yi aser shi mayoktsü tenokdangba agütsüogo. Uttar Pradesh, Assam, Uttarakhand, Chhattisgarh aser Rajasthan state tem nung "Dry Day" alitsü osang metetdaksü.

Ampareen Lyngdoh-i Parliament nung Hindi agi jembitsü renema lir



Shillong, January 13, 2024

(Agencies): Meghalaya nung Shillong parliamentary menden atema National People's Party (NPP) candidate Ampareen Lyngdoh-i takok ngura Parliament nung Hindi agi jembitsü renema lir ta metetdaksüogo.

"Onük ajak benoktsü atema ni Hindi aig jembitsü renema lir ajisüaka Meghalaya nunger

madak Hindi benokba magizüker" ta lai ashi.

"Parliament nung Hindi agi o atsütepa arur aser nia Meghalaya nunger ola angashidaksütsü atema Hindi agi jembitsü mulunga lir. Ajisüaka Meghalaya nunger madak Hindi oshi benoka jembidaksütsü merangba aitsür" ta Ampareen-i metetdaksü.

Delhi nungi Meghalaya semdangi arurtemi ozü nübori angatetba oshi jembitsüla. Parnoki nübortem mangatetba oshi jembiba magizüker, ta lai ashi.

"Tamangaba yimsü shia akhümtsübuttsüla. Asenek secular linük nung lir aser ibaji kümzüka ayutsüla" ta laisa shisem.

Asenoki Constitution nung Sixth Schedule kümzüka ayutsüla. Meghalaya nung lisopurtem temetenten, sobaliba aser tashimait kümdaksüba ya magizüker ta NPP lennirisa ashi.

Laisa Constitution nung Eighth Schedule kübok Khasi oshi dendaksütsü nangzük.

Meghalaya Games 2023 tembangba sülen NPP candidate Ampareen Lyngdoh-i nüboyimba maparen tenzüktsü imlar.

Kechiba PM Modi-i Manipur mesemdanger: Jairam Ramesh

Imphal, January 14, 2024

(Agencies): Yaküm May ita nungi Manipur tensa mejungi akümba sülen Prime Minister Narendra Modi-i state khen danga mesemdang ta Congress lennir Jairam Ramesh-i ashi.

Bharat Jodo Nyay Yatra tenzükba sentong nung osangbener den jembidang "Kechiba PM Modi-i Manipur mesemdanger. Rahul Gandhi-i Manipur nunger den tejashi lemsateptsü atema aruogo saka PM Modi-ibo state mesemdanger" ta Ramesh-i

ashi.

"Joko ita ti jungogo. Kechiba Prime Minister-i Manipur mesemdanger? Kechiba pai ola madoker? Pai Manipur Chief Minister mesüra MP tem mesüra political parties mesüra MLA tem den majurutep. Kechiba Prime Minister ita ti tashi tsüba dang arur?" ta pai asüngdang.

"Nisungtem arua Rahul Gandhi den ajurutep. Parnoki parnok tejashitem pa den lemsateper. Rahul Gandhi-i tan agi tanaben Manipur

semdanger. Pai taoba mapang arudang anogo asemnü mongzük. Nübortem pa dang pabo arur saka kechiba Prime Minister marur ta asüngdanger" ta Ramesh-isa ashi.

Deobarnü Thoubal district kübok Khongjong nungi Rahul Gandhi aser Congress president Mallikarjun Kharge nati Bharat Jodo Nyay Yatra tenzüktsüogo.

Iba sentong nung Rahul Gandhi-i Manipur tensa majungba atema PM Modi dak tai tonglokttsü.

BJP-i Lok Sabha menden 450 tema angutsü: Tripura CM

Agartala, January 14, 2024

(Agencies): Taruba Lok Sabha elections nung BJP-i menden 450 tema nung takok angutsü ta Tripura Chief Minister Manik Saha-i ashi.

BJP sorkari mapa tajung aika inyakogo aser tanü linük ajungalen "Modi Hai Toh Mumkin Hai" ola adoker, ta CM Saha-i ashi.

"Taruba Lok Sabha

election nung onoki Prime Minister Narendra Modi nem lapo naro ana agütsütsü aser ibaji MP menden anaprong BJP-i takok angutsüba lir. Narendra Modi nem maneni Prime

Minister inyakdaksünür. Iba alizüng atongtsü atema Tripura nung maparen tenzükogo. BJP-i menden 450 tema nung takok ngua maneni sorkar akümstü"

ta paisa metetdaksü.

"Tripura nung Campaign sentongtem agidar. Lok Sabha elections nung BJP-i meden 404 nung takok angutsü amanger saka nibo menden 450 tema nung takok angutsü ama bilemer. 2024 Lok Sabha elections nung onoki PM Modi nem lapo naro ana agütsütsü" ta CM Saha-isa metetdaksü.



Assam kübok Mankachar nung Border Security Force (BSF) sepaitemi ozüng alema shibelenba shini (sugar) tonnes 6.4 apuba mapang agiba noksa angur. 45th Battalion BSF sepaitemi Sukhchar-Khagrachar riverine channel anasa Brahmaputra River nung mita aodang India nungi Bangladesh-i bener aoba Rs 2.56 lakh shi alang shini apu.

North Korea-i ballistic missile ka tendangogo

Seoul, Aenjeti/January 14 (Agencies): South Korea-i ashiba agi, North Korea-i linük anüdok tzükümleni ballistic missile ka khaketa yokogo.

South Korea indang Joint Chiefs of Staff-i ashiba agi, missile ya Deobarnü tendang ajüsüaka iba dak sendakba nung osang tejangja magütsü.

South Korea den tzüyim nung arrtsü anasa North Korea-i artillery injang aika khatokba sülen anogo ishika lir tang missile ya tendangogo. North-i artillery injang

khatokba sülen South-ia kasa tesem nung artillery injang aika khatoka liasü.

December ita tatemlen ruling party senden ka nung North Korea lenir Kim Jong Un-i, linük indang nuclear hadir atsülangshitsü aser ano spy satellite talila yoktsü tenangzükba agütsüogo.

Kasa mapang nung North Korea nunger sepaitemi North-South arrtsü temeket nung Demilitarized Zone-i prangbong hadir tulutem bener aruogo aser guard post

yanglushiogo, koba linük ana yagi raksa liasü.

North aser South Korea na mannei rara nung dang lir, kechiyong 1950-1953 Korean War ya yimjung nung masü saka rara anena atatsü atema tenangzüktepba dang yanglur tembanga liasü.

Tawa Pyongyang-i Moscow den tesendaktep yanglutsü merangdar aser Russia Foreign minister Sergei Lavrov-i jaokba sülen North Korea indang Foreign minister Choe Son Hui Hombarnü Moscow-i aotsü.

Maldives-i India dang sepaitem anizüker aotsü ashi

Male, Aenjeti/January 14 (Agencies): Mejimonu nung mangatettep adoka aliba mapang ka nung Maldives Tir Mohamed Muizzu-i India dang par linük nungi March 15 tashinung sepaitem anizüker aotsü shiogo. Muizzu-i China semdang anogo ishika lir iba osang ya arur alitsü.

Sorkari tang tesüsa ashiba agi Maldives nung India nunger sepa 88 lir.

Osangbener senden ka nung jembidang President's Office nung public policy secretary Abdullah Nazim Ibrahim-i ashiba agi, Tir Muizzu-i India dang par sepa 15 tashinung anir aotsü asüngdangogo.

"Indian military personnel tem Maldives nung melitetsü. Ibai Tir Dr Mohamed Muizzu aser iba administration indang policy lir," ta pai ashi.

Sepaitem anizüker aotsü atema jembishinütsü asoshi high-level core group

mezüngbuba senden Male nung aliba Foreign Ministry Headquarters nung Deobarnep mena liasü. Iba senden nung Indian High Commissioner Munu Mahawar aden ta ashir. Nazim-ia iba senden amenba indang jangjatsü aser senden nung sepaitem March 15 tashinung anizüker aotsü onük ya jembia ta ashi.

Taoba küm November 17 nü Maldives tir inyaksü tezüngzüktep agiba sülen Muizzu, shiba China bhukumba lenir ta züngshir, pai India dang par linük nungi mitkartem anizüker aotsü mepishi aser New Delhi dang iba temepishiba agütsütsü Maldives nung aliba nüburtemi künem tashi agütsü ta shia liasü.

Ato Kilonser Narendra Modi anema Muizzu sorkar nungi deputy minister asemi o tamajung züluba sülen linük ana tsüngta mangatettep adoker lia Indian sepaitem anizüker aotsü

ya asüngdang.

Social media nung item o züluba sülen Muizzu-i minister asem ya mapang tatsüka atema anentsü, kechiaser Russia sülen tourist timba aoba linük, Indian tourists temi maotsü yimyim ayim tenzük.

China nunger tourist ya jenjang tasembuba nung lir.

Tawa Muizzu-i China semdangba mapang Maldives ya Beijing den tali lungjemshitsü meranga liasü.

Honibarnü China nungi meyipa shilangba sülen osangbener den jembidang, "Ozü linük tila süaka, onok mesüshitsü shinga nema license magütsü," ta Tir Muizzu-i shia liasü.

Paisa India dak metaloka aliba ajemtsü sentongtem sangdonga liasü aser item rongnung bendang lima nungi chiyongtsü, mozü aser achi-ajemtsü osettem alitsüba densema lir.

Hamas-i Israel amakba sülen Gaza nung rara tenzük anogo 100 jungogo

Tel Aviv, Aenjeti/January 14 (Agencies): Anogo 100 tejakdang Israel nung meimchir temi matongba aser masadangba ka atalok.

Honibar aonung Tel Aviv nung October 7 nü atalokba adenshia liasü. Nisung ajak amai mulungjang nung Hamas teloki pua bener aoba aser tang tashi Gaza nung yua aliba nisung 130 shi bilemteta liasü, karbo takum malitsü akok.

Anogo 100 süyogo, October 7 anepdang Hamas telungpurtem nok-nü tesashi bener Gaza arütsülen nungi tesem balala arua sapanga liasü.

Parnoki kibbutzim, military bases aser arütsü anasa aliba jila amak, kong Gaza nungi rockets khaloktsüba yimya ka ama kumer liasü saka Hamas teloki arütsü alema aita azüdokshiba khenyongi balaka liasü.

Arütsülen nisung 1,200 tepset aser Israel defences kanga mejungi aoksatsü.

Ken meimer lanur nisung noklang aika Nova festival nungi jena aoba noksa ngua Israel nunger temulung taroktiba tonga lua aoksa. Iba benjongmung tesem nung nisung 360 dak tema tepset aser aika Gaza-i pua bener ao.

Tel Aviv nung iba sentong nung adenertem rongnung samar alir kinungertemi pposter bener aser T-shirt nung parnoki meima aliba nisungtem noksa inoker sema liasü.

October 7 nü iba lendong atalokba sülen Israel mitkar temi Gaza nung bomb pokloktsü tenzük aser Hamas samatsütsü par nükjidong akum.

Linük north tsütsü Gaza yimti

nungi south tsütsü Khan Younis tashinung nisung aliba tesem timba raksatsüogo.

Hamas tashi mait kumogo aser parnok 'organised force' ka ama inyaksangshitsü tamakoktsü kumogo, ta Israel-i ashir. Israel-i iba alinük tilaka nungya bomb zünger mezüngmai poklokja amakdang nisung 23,000 dak tema takum samaogo aser item ya aika tetsür aser tanurtem lir, ta Hamas meyong Health Ministry ajanga ashir.

Nisung meyirijang aika ki o jen laoba agi nembanger süa alitsü südi ta amanger.

Gaza nütsüng yongsük shilem 85 bo pei ki yutsür tesem balala nung jenshia lir ta Palestine ketdangsürtemi ashir.

Civilian tem kanga timtemba ngua linük balalai Israel dang Gaza nung rara anena atatsü mesüra ceasefire alitsü ajungshir.

Israel asoshi tembar tajungtiba aser tarutsü nung October 7 nü ama matalokdaksütsü aser par self defence temeden asoshi nokdakba US-ia Ato Kilonser Benjamin Netanyahu dang civilian asüba onsara lir ta ashir.

Israel-i tapi agi tanen makai bomb pokloktsüba mechi alimai par bhukumba samaa aor ta US Tir Joe Biden-ia ashi.

Ajüsüaka Israel sepaitemi maneni central aser southern Gaza nung Hamas telok alidak maneni amaker aser Israel Ato Kilonser Netanyahu-i bilemba dang nungi talangba raratsü amai ajiteter.

Hamas okshia mesamatsü tashi rara manentsü ta Israel-i ashir.

India nunger Khristantemi UK nung... (Tapak 5 nungi...)

Kasa report nungjisa India nunger lanurtemi Arogo nung shilem agiba indang shia lir. London nung arrshi küm 25, Ephrem Sam Mattappallil leniba nung Indian Orthodox Arogo nung kaketshirtem anepaluba telok ka lir. Tang tashi nung parnoki nisung 120 shi yariogo aser timtemertem yariba den külemi linük tasen nung timtem ajangshirtem nungita yarir.

UK tesem balala nung India

nunger Khristantemi Arogo balala nung adener.

Salisbury, Wiltshire nung aliba St Osmund Arogo nung putir Jonathan Creer-i Arogo nung züngsem kanga renlokba atema pelaba lemsatep.

Creer-i, "India nunger aikati Arogo nung adenba ajanga Tenla kidang nisung kanga longsoa kumogo. Parnok teimbaka local NHS hospital nung inyaker," ta metetdaksü.

Creer-isa, India nungi aruba kibongtem nungji tanurtem aika lir aser tainlonglongpurtema aika lir; British nunger lanurtem den medemdangra India nunger lanurtembo aikati Arogo nung adener, ta metetdaksü.

Yaküm Tamil Nadu kübok Chennai nungi Eltham, south-east London-i oa alir arrshi küm 25, Arun Vedhanayagam Selwyn-i Anglican St John the Baptist Arogo nung adener.

Colombia anentsüh lendong nung nisung 33 asü

Bogotá, Aenjeti/January 14 (Agencies): Colombia northwest len tziunglu kanga sashia aruba sülen anentsüh lendong tulu atalok nisung 33 tashi süogo, ta ketdangsürtemi metetdaksü.

"Iba lendong nung tanurtem timba sür nisung 33 tashi asüba osang anagazüka kanga sasaseta bilemer," ta Vice President Francia Marquez-i social media sabang X nung zülutsü.

"Anentsüh nung sabanga alirtem kümzüktsü atema tekümzükba maparen maneni benoka inyakdar," ta lai ashi.

Anentsüh koba Hokolbarnü nikongtsütsü alua liasü, iba anentsüh yagi Pacific province, Choco nung Quibdo aser Medellin yimti tsüngda lenmang anenbangogo.

Kasa mapang nung lenmang nung senzüa alir aika yiruogo aser nisung karbo parnok mena aliba gari ali agi anenbangba sülen tang tashi monguteti lir.

Colombia police indang specialised rescue group kati taküm alirtem kümzükogogo aser iba den tasümgang dena agiteta liasü.

Medellin nung ketdangsürtemi ashiba agi,

Honibar anepdang tasümgang 17 tashi yokogo aser forensic examiners temi tasümgang asem maitsü jangjaogo, ta AFP news agency sangdong ka ajanga metetdaksü.

Lenmang aika anenbanger aliba ajanga tekümzükertem anentsüh lendong agi kanga mejungi kongshir aliba tesemtem tonga aotsü atema tetsükdaksü adoker.

Sepai 50 shi teyari agütsütsü atema yokogo aser army-i lemsatepba noksa balala ajanga lishi agi nübanger aliba nisungtemi anentsü yatoktsü merangba nguogo.

Taoba ghonda 24 tashi tziunglu kanga sashia aruba sülen Pacific tziyüm kumbang nung aliba Choco tesem nung anentsüh alua liasü.

Social media nung noksa balala ajanga tenem nungi ali anenzüka alua lenmang nung senzüa aliba garitem anenbangba nguogo.

Iba lenmang ya Colombia indang National Unit for Disaster Risk Management (UNGRD)-i shibangtsüogo.

Colombia kübok kasa tesem nung 2022 küm anentsüh aluba sülen nisung 27 asü.



US Capitol jakdang Freedom Plaza, Washington nung Gaza bhukuma nüburtemi March on Washington for Gaza rally nung shilem agiba noksa nung angur.

Malaysia Open: Satwik aser Chirag nati silver dang ngutet



Malaysia Open badminton asayamung nung tetsür tarep final akokba sülen Japan tsür Arisa Higashino aser yuta Watanabe na tangokba noksa nung angur.

Aenjeti/January 14, 2024

(Agencies): India nunger tebur tarep asayar Satwiksairaj Rankireddy aser Chirag Shetty nati Deobarnü Malaysian Open final nung China nunger tarep Wang Chang aser Liang Weikeng na mekoki silver medal dang nguteta liasü.

Tarep ana tsüingda set asem tashi kanga toktepa asayaba sülen Satwik-Chirag nati 21-9, 18-21, 17-21 agi Liang aser Wang na mekoki liasü.

Satwik aser Chirag nati mezüingbuba set bo 21-9 agi ayong ayonga akok aser asaya ayong ayonga kokatotsü ta bilema liasü.

Asia Olympic Qualifiers: India nunger shooter temi maneni gold ngudar

Aenjeti/January 14, 2024

(Agencies): India nunger shooter temi tanga asaya aliba Asia Olympic Qualifiers nung maneni kanga junga asaya Deobarnü Yogesh Singh-i tebur 25m individual standard pistol event nung gold medal ka nguogo aser paisa Amit Kumar aser Om Prakash na den longjemer team event nunga gold medal nguogo.

Kuwait yimti nung shotgun discipline atema Olympic qualifiers nung qualification mezüingbuba anogo sülen India nunger tetsür trap shooter ana tashi jenjang

Ajisüaka taruba asaya ana nung Liang aser Wang nati tena akoktsü asoshi kanga zübarbo masü ta kuli agüja tanabuba set 21-18 agi koka kasasa aküm aser deciding asayatsüsa aküm.

Tasembuba set nung telok ana tsüingda kanga toktepa asaya aser mezüingbo Satwik aser Chirag na point pongu agi tejakdang liasü.

Iba sülen Liang aser Wang nati asendenshir kanga junga asaya tenzük aser point melentepa ngua kanga toktepa asayaba sülen point 14-14 ta kasasa aküm. Ajisüaka China nunger asaya ana yagi maneni tajungba asayateta 21-17 agi

kanga junga lir aser Hombarnü final atema top six-i iogo.

Deobarnü Yogesh-i point 572 ngua standard pistol event nung gold angu aser Amit (565) o Prakash (553) na den longjemer team event nunga gold medal ngua liasü.

Iba asayamung nung India nunger shooter temi ajak senteper medal 32 ngua lir, kong gold 14 aser silver 10 densema lir.

Asian championship nung India team-i tang medal timtiba ngutetogo.

Shotgun qualifications

asaya koka liasü.

Semifinal nung Satwik aser Chirag nati kanga meranga asaya South Korea nunger tarep Kang Min Hyuk aser Seo Seung Jae na 21-18, 22-20 agi koka final-i ia liasü.

Satwik aser Chirag nati 2023 kuma iba asayamung semifinal tonga asayaogo. Tena tawa kanga junga asaya arudar aser taoba kum tenati Asian Games nung gold medal nguogo aser iba den Indonesia nung Super 1000 asayamung ka, Korea Open Super 500 aser Swiss Open super 300 kokogo. Tena taoba kum mezüingbuba ranking nung World No. 1 kuma liasü.

koba tebur aser tetsür trap asaya tenzük iba asaya nung Shreyasi Singh-i mezüingbuba 75 targets sülen point 71 ngua tanabuba jenjang nung liasü. Bhavya Tripathi-ia round asem sülen point 68 ngua pa-a top six nung liasü. Manisha Keer (65) 11buba nung liasü.

Trap asaya atema qualification tatembangbuba round aser final asaya Hombarnü asayatsü. Iba asaya nunga Olympic quota anana angutsü maongka lir. India nunger asayartemi asaya anaprongla nung quota kaka ngutettsü.

Antonsen-i Malaysia Open tebur kija asaya kokogo

Aenjeti/January 14, 2024

(Agencies): Denmark nunger asayar Anders Antonsen-i Deobarnü Malaysia Open tebur kija asaya final nung China nunger asayar Shi Yuqi koka takok marok benogo.

Arishi kum 27 tain Shi-i Honibarnü semifinal nung world number one aser defending champion Viktor Axelsen kanga meranga asayar

koka liasü aser pa final asaya nungbo belematoker liasü.

Final asaya ya Antonsen-i 21-14, 21-13 agi ayong ayonga koka liasü.

Tetsür kija asaya final nung South Korea tsür An Se-young-i 10-21, 21-10, 21-18 agi Taiwan tsür Tai Tzu-ying kokogo.

Kasa mapang nung Japan nunger tarep Yuta Watanabe

aser Arisa Higashino nati tarep temeyoktep asaya final nung South Korea nunger tarep Kim Won-ho aser Jeong Na-eun na 21-18, 21-15 agi kokogo.

Maneni tetsür tarep asaya final ya China team dang ana asaya aser Liu Sheng Shu o Tan Ning nati 21-18, 21-18 agi Zhang Shuxian o Zheng Yu na koka liasü.

6 Buba Supongmeren Memorial Volleyball Trophy ayonger

Dimapur, Aenjeti/January 14

(TYO): Mokokchung district kükob Molungkimong yimdak January 18-19, 2024 anogotem 6 Buba Supongmeren Memorial Volleyball Trophy ayonger.

Iba asayamung ya anepdang 9:00 ako nungi tenzüksü.

Iba asayamung nung takok angur nem sempet telemsa yamai alitsü: Champion nem senpet sen 70,000 den trophy aser certificate, Runner Up nem senpet sen 50,000 den trophy aser certificate, 3rd Place nem senpet sen 30,000

den certificate aser 4th place nem senpet sen 10,000 agütsütsü.

Maneni kija nem senpet yamai agütsütsü: Best Spiker - Rs. 2000/-, Best Setter - Rs. 2000/-, Best Discipline Team etc.

Team shia entry fee sen 3000 alitsü aser form submission atema January 16, 2024 ya tatem asütsü. Iba asayamung dak sendakba nung maneni mobile number 9383014469 aser 7005700719 nung tongteprateptsü akok.

Shaun Marsh professional cricket asaya nungi anener



Aenjeti/January 14, 2024

(Agencies): Australia nunger cricket asayar Shaun Marsh-i Deobarnü pa professional cricket asaya nungi anentsü telemetba agiba sangdongogo. Pa tatembangbuba asaya Big Bash League nung Melbourne Renegades' nungi Bodhbarnü Sydney Thunder den asayatsü lir.

Taoba Australia captain Aaron Finch tsüingsü nung anidaka pa asaya nungi anentsü telemetba agiogo.

"Ni Renegades nungi jangradema asayaogo. Taoba kum pongu tsüingda ni nisung tajung kar ajuruogo aser item nisungtem den medemer ayimba ya takum tepeyong atema asütsü," ta arishi kum 40 tain Marsh-i ashi.

"Renegades indang coach aser staff tem ajak aser club den sendaktepa alir ajak dang kanga pelar, nenoki tetenzük nungi

tatem tashi ni nongita yariogo aser iba ajanga asayaba moapu nung kü mapa tayongba kümdaktsüiogo," ta pai ashi.

Pa yiruba ajanga season menor tenzükaka Marsh-i asaya pongu nung run 181 yangluogo aser iba den pa indang average 45.25 aser strike rate 138.16 lir. Pai asaya pongu nung half century asem tashi yanglua liasü.

2019-20 season nung Renegades pur den maden tsüingda Marsh Perth Scorchers nungi 2011 nungi 1019 tashi asaya liasü. Paisa, pa taoba mapang asayaba team dang kanga pelaba lemsatepogo.

Marsh ya Australia team nungia format ajak nung kanga takok ngua asayaogo. Pai century 13 densema run 5,200 yanglu. Pa Australia team nungi tatemsa Sri Lanka den Oval nung 2019 ODI World Cup nung asaya liasü.

BILEMDANGANG
"Tanidaker tajung ka ji lenir tajung ka den kasa."